

**Nuna tamakkerlugu ineriartortitsinissamut pilersaarutissap sananeranut atatillugu sinaakktissat tunngavissallu tikkuussisussat Kalaallit Nunaata qanoq iliorluni nunatut kitaamiusut allatulli ukiumut agguaqatigiisillugu aningaasarsiornikkut ineriartortitsisinnaanera pillugu apeqquteqaat aallaavigalugu oqallinnissamik siunnersuut.**

(Inatsisartunut ilaasortaq Andreas Uldum, Demokraatit)

### **Akissuteqaat**

(Inuussutissarsiornermut Aatsitassaqaarnermullu Naalakkersuisunut ilaasortaq)

Apeqquteqaat aallaavigalugu oqallinnissamik siunnersuuteqartoq Andreas Uldum qutsavigissavara. Naalagaaffigisami ineriartortitsinissamut periusissaq tassaavoq inuiaqatigiit suulluunniit piffissap ingerlanerani pingaarnertitaalluinnartut politikikkut aalajangiussiffissaasa ilaannik paasiniaanissamut sakkusoq tulluortoq.

Siuarsarnerup inuiaqatigiinnilu ineriartortitsinerup oqallisiginerani tamanna taamaallaat pisortat missingersuusiaanni sinneqartoormut paarlaatinnginnissaa pingaarpoq. Ukiumoortumik oqimaaqatigiissaakkanik missingersuutilimmik Naalakkersuisut politikkaa tulluortuullunilu pisariaqartoq malittariniarpaat. Pisortani taarsigassarsiorneq aqutissaanngilaq. Tamatuminnga siunnersuummik saqqummiussisoq Naalakkersuisut isumaqatigiilluinnarpaat. Siuarsarnermik tamakkiisumik periusissiami pingaarutilittut ilaatitamik Naalakkersuisut 2025-mut pilersaarussiaq saqqummiussimavaat.

Ungasissumut anguniakkatsinnut Kalaallit Nunaata imminik napatittuuneruneranut inuiaqatigiinni ineriartormik naammaginarumik ikorfartuisuusussamik Naalakkersuisut aningaasaqarnikkut siuarsarneq kissaatigaat.

Tamatumunnga pisariaqarpoq inuussutissarsiorfimmi ineriartortitsineq, immikkoortoqarfiit nutaat annertunerusumik suliffeqalersitsillutillu isertitassanik pilersitsisinnaallutik.

Ataatsimiinnermi saqqummiussatsinni 2025-mut pilersaarummut ilanngullugit suliniutinik angisuunik inatsit, inuussutissarsiornermut inatsit nutaaq, aluminiumik suliniummut sinaakktissatut piumasaqaatit siuarsarnermut periutsimut tamakkiisumut pingaarutilittut akuupput. Tassanissaaq inuussutissarsiuutinik siuarsaanermik inatsisisiliorneq nutaaq annertuumik sunnuteqarfiussaaq, soorlulusooq 2018-imut suliassaqartitsinerumut pilersaaruterput aamma siuarsarnissamik periusissiatsinni tamakkiisumut ilaalluni.

Aningaasaqarnikkut immitsinnik napatinnissatsinnik anguniakkatta piviusunngortinnissaannut aatsitassarsiorfik suliniutinillu angisuunik suliaqarfiup pingaarnertullugit aalajangiisuusutut Naalakkersuisut isigaat. Inuussutissarsiuutigut suliniutit angisuut siuarsarnermik annertusaasinnaapput, aammalu innuttaasut suliffeqarfiillu isertitaannik annertusaasinnaallutik. Suliniutit angisuut sunniutaannik naatsorsuinerit aamma takutippaat aningaasaqarnermik aalaakkaasumik isumannaarisussanik aqqqissuussisoqanngippat kisimik ingerlanneqarsinnaanngitsut, taamaalillutillu ilaatigut 2025-mut pilersaarummi allassimasutut atugartuussutsimik attassisinnaanngitsut.

Naalackersuisut Kalaallit Nunaata siunissaanik siunnersuummik saqqummiussaartup takorluugaanik tamakkiisumik isumaqatiginninnerat qularutissaassaangilaq, tamaani siuarsaanissamut pisariaqartumut aatsitassarsiornermik suliniutinillu angisuunik immikkoortoqarfiit tunngaviussallutik. Aatsitassarsiorfimmi soorunami iluaqutiginiagassatsinnik assersuussarisinnaasanik iluaqutissaateqarpugut.

Siunnersuummik saqqummiussisup oqariartuuteqarfiginiagaanik piujuartitsisumik tunngaveqartumik siuarsarnissaq pillugu anguniagarpiat inuussutissarsiuutinik siuarsaanissamik politikkimigut Naalackersuisut anguniagarai. Soorlu siunnersuummik saqqummiussisup ”pisariaqarluinnaqqissaarpoq annertusaanerup aallartinnissaa”-nik oqaasertaliineratut inuussutissarsiuutinik siuarsaanissamik iliuserisat anguniagaat taamaassaneramik – taamaattuuneranillu – isumaqataavunga. Tamanna pilersitsiniarnermik, nutaaliarnermik suliaqarusussutisimillu siuarsaasunik aqqiissutitigut pivoq. Pisortat ingerlatsinissamut tapiissutiguassaanut aningaasaliinikkut pinngilaq. Tamanna maannakkut Inatsisartut suliarisaanik inuussutissarsiornermik siuarsaanissamut inatsimmut nutaamut siunnersuummi allassimasutut inuussutissarsiornermik siuarsaanissamut aningaasat nalinginnartut ingerlatsinissamut tapiissutitut tunniutiinnarneqartassanngillat.

Assersuut alla tassaavoq ilinniarnermut politikki pisortaqaarfiup ingerlalluurtup siuarsarnermut aallussaa Taanna siuarsarnermut tunngavigisassat pilersinniarnernanni pingaarutilipilussuurtut ilaavoq. Siunissami suliffissanut periarfissaalersussanut inuusuttortavut isumaginnissinnaalernissaannut piareersartariaqarput. Tunngaviusumik nalinginnaasumik ilinniagaqarneq, aammalu siuarsakkatut inuussutissarsiuutinut tunngatitanik immikkut ittutut ilinniagaqartitsinikkut iliuitsit anguniagaqarfigaavut.

Eqikkaallunga Aningaasaqarnikkut siuarsarnerup piviusunngortinnissaanut Naalackersuisut nutaamik inuussutissarsiuutinik siuarsaanissamik politikkimikkut, ilinniagaqartitsinermik politikkimikkut aammalu aningaasaqarnermi politikkitut ingerlassamikkut sinaakkutissanik pitsaasunik isumannaarinerat isumaqarfigaara.

Suliniutinut angisuunut atugassiatigut, inuussutissarsiuutinik siuarsaanissamik inatsisiliornikkut, suliassaqartitsinermik pilersaarutikkut aamma ilinniagaqartitsinermik politikikkut – kiisalu 2025-mut pilersaarummi ilaatitat sinnerisigut – erseqqissumik siuarsarnissamik periusissiaqarnerput eqikkaallunga inerniliissutigissavara.